

To'on yó'o kían kúú uú nì taa San Pablo nì sa'an noó na ñoo Corinto

Ká'an Pablo ndisá'an

1 ¹ Yu'u kúú Pablo, ta kúú iin apóstol, na né'e to'on Jesucristo, táto'on kì'o kónì mií Ndios. Ta yu'u xí'ín ñani yò Timoteo ká'an ndu ndisá'an xí'ín ndo'ó, na kúú ñayuu Ndios ndéi ñoo Corinto xa'an, xí'ín ndidaá ka ñayuu Ndios ndéi chí kuendá Acaya. ² Ta mií tatá yò Ndios xí'ín sato'o yò Jesucristo ná kee ña manì xí'ín ndó, ta nakì'o ná ña koo va'a ini ndo.

Yó'o ká'an Pablo sa'á tandó'ó ndó'o na

³ Ná natiin Ndios, na kúú tatá sato'o yò Jesucristo, ndidaá tá'an ñañó'ó. Mií ná kúú tatá, na daá kuití kú'u ini sa'a yò, ta xí'o na tandéé iní ká'ano noo yò. ⁴ Ta noón kúú na xí'o tandéé iní noo ndú'u tein ndi ndáa mií tandó'ó ndó'o ndu, dión, dá ná ni'i iní ndu ndi koo kee ndu kì'o ndu tandéé iní noo dao ka ñayuu tá ndó'o na ndi ndáa mií tandó'ó. Dá chì táto'on kì'o xí'o Ndios tandéé iní noó ndu'u, kì'o dión ta'ani xí'o ndu tandéé iní noo dao ka ñayuu. ⁵ Ta sa'á ña sá sá'ano tandó'ó ndó'o ndu kua'an sa'á to'on Cristo, sa'á ñoó sá'ano ta'ani tandéé iní ní'i ndú noo ná. ⁶ Chì tá ndó'o nío ndú, ñoó kían kedaá xí'ín ndó, dá ni'i ndo tandéé iní, ta koni ndo kaki ndó. Ta sa'á ña xí'o Ndios tandéé iní noó ndu'u, sa'á ñoó ní'i ta'ani ndó tandéé iní kée ndu'u, ta koni ndo kaki ndó. Dión, dá kì'o ta'ani na tandéé iní noo ndo tá ndó'o nío ndo táto'on kì'o ndó'o nío ndu'u. ⁷ Ta mií'an ndaa ío tandéé iní noo ndú'u sa'a ndo, chì ná'á ndú ña sa'á ña ndó'o dáó nío yò, sa'á ñoó táto'on kì'o xí'o na tandéé iní noo ndú'u, kì'o dión ta'ani xí'o na tandéé iní noo ndo'ó.

⁸ Ñani, kónì ndu'u ña kana'á ndó sa'á tandó'ó ká'ano nì ndo'o nío ndú tá nì sa'an ndu chí kuendá Asia di'a. Ta ka'í nda'o nì ndo'o ndu o duú ña kì'o ndeé iní ndu kían, sa'á ñoó nì ndi'i va tandéé iní noó ndu'u ña kankuei takí ndu. ⁹ Ta ñoó kúú noó nì katónì ini ndu ña kua'an ndu kuu ndu. Ta dión nì ndo'o ndu, dá kían ná dá'a ni kandeé iní ndu mií ndú, di'a ná kandeé iní ndu iin tó'ón dinì Ndios, na dánátaki na nì xi'i. ¹⁰ Chì noón kúú na nì dakáki ñaá tiempo daá, ta mií ta'ani na dakáki ñaá viti, ta kándéé iní ndu ña dakáki ñaá noo ndidaá tandó'ó ná'ano kónì dánaá ñaá, ¹¹ dá chì chindeé ndó ndu'u xíka ndo ña manì noo Ndios sa'á ndu'u. Chì tá kua'á nda'o ñayuu xíka ña manì noo Ndios sa'á ndu, dá kían kua'a ka ví ñayuu nakì'o ndivé'e noo Ndios sa'a ndidaá ña manì kée na xí'ín ndú.

Yó'o nákaní Pablo ndivá'a kọ ní sa'án nà ñoo Corinto

¹² Ta ió iin ña'a kédaá xí'ín ndú, dá ka'án va'a ndu cháá sa'a mií ndú, ta kíán ña kọ kútúú ta'on ini ndu sa'a ni iin ña'a kée ndu, dá chí kéndaa ndu ndidaá ña'a, ta kée nduan xí'ín ndino'o ini ndú noo Ndios. Ta kọ kéchóon ta'on ndu ña ndichí ió ñayuu yó'o. Di'a kée nduan sa'a ña maní ni kee Ndios xí'ín ndú. Ta dión kée ndu iin ní kúú vá noo xionoo ndu, ta dión kéndaa cháá ká ndu xí'ín ndo'ó. ¹³ Ta kọ táa ta'on ndu dao ká to'on, ña kíán o kándaa ini ndo, o ña o kátí'a ndó ka'i ndó. Chí ndáti yu'u ña miían kasandaá ndo kandaá ndi'i ini ndo, ¹⁴ dá chí táto'on kị'o sa kandaá ini ndo cháá ña ndu'u kúú nà ió ñañó'ó ndó noo, kị'o dión ta'ani koo ñañó'ó ndú noo ndo tá ná kasandaá kuu nandió koo tuku sato'o yo Jesús kasaa nà.

¹⁵ Ta xí'ín tandeé iní yó'o ni ka'ín saai dinnó'ó noo ndéi ndó, dá chindeéi ndo'ó uu ta'ándá, ¹⁶ chí ni ka'ín chika'andai noo ndéi ndó, dá ya'i kọ'in chí kuendá Macedonia di'a. Ndi'i daá, nandió koo tukui noo ndéi ndó, dá kíán kee ndó ña maní kọ'on ndo dáya'a ndó yu'u íchí kua'án chí Judea di'a, ni ka'ín. ¹⁷ Tá ni ka'ín xí'ín ndó ña dión keei, ía ká'án ndó ña iin ndakána ni ka'ín xí'ín ndó? O, ía ká'án ndó ña kée yu'u táto'on kị'o kée ñayuu kọ ná'á Ndios, tá'an nà ká'án “jaan” xí'ín yú'u ná, ta xí'ín ñaxintóni ná ká'án nà ña “koó”? ¹⁸ Tído iin nà ndaa kúú Ndios, ta mií ná kúú nà ná'á ña kọ ká'án ndu “jaan” xí'ín yú'u ndú, ta xí'ín ñaxintóni ndú ká'án ndu ña “koó”. ¹⁹ Ta sa'a Jesucristo, nà kúú de'e Ndios, ni daná'a yu'u xí'ín Silvano, xí'ín Timoteo noo ndo. Ta kọ ká'án Jesús “jaan” xí'ín yú'u ná, ta xí'ín ñaxintóni ná ká'án ña “koó”. Ta sa'a mií ná ká'án Ndios “jaan” xí'ín yó, ²⁰ dá chí sa'a mií Jesús xínkoo ndi'i to'on ni xí'o Ndios noo yo, ta sa'a mií ná ká'án yo “Dión ná koo” dá ná natiin Ndios ñañó'ó noo kéká'ano yó nà. ²¹ Ta mií Ndios kúú nà ná'a ndaa ña ndu'u xí'ín ndo'ó kúú ñayuu mií ná sa'a ña ndíko yo Cristo, ta mií ta'ani na kúú nà ni kaxi yó kakuuó ñayuu nà, ²² chí ni kani na sello níó iin rá iin yó, chí ni xí'o na Espíritu ií ná koo na níó yo, dá katóni ini yo ña miían ndaa natiin yó ndidaá ká ña va'a ni kaa nà tei na noo yo. ²³ Mií Ndios kúú nà chíkanii xí'o kuendá sa'í, chí ná'á ná ña sa'a ña kọ ní xíin dákúnda'í ini ndo'ó, sa'a ñoó kọ ñá'a kasandaái ñoo Corinto xaan. ²⁴ Tído ná dá'a ni ka'án ndó ña kóni ndu ka'anda ndu choon noo ndo noó ña kánian kee ndó sa'a ña kándísa ndó Jesús. Di'a ndúndéé ndu'u kéchóon ndu noo ndo, dá kadii ini ndo, chí sa ndíta toon ndó xí'ín ña ndaa kándísa yó.

2 ¹ Sa'a ñoó ni chikaa inii ña o sáa ta'oin noo ndéi ndó viti, dá ná dá'a ni dákúnda'í inii ndo'ó. ² Dá chí tá ná dákúnda'í inii ndo'ó, dá kíán, índá yoo kị'o ña kadii iníi, tá dáá? Chí nà ndáti yu'u kị'o ña kadii iníi, nandei nda'í di'a na kee yu'u. ³ Sa'a ñoó ni taai iin ká tuti ñoó kosaaan noo ndo, dá kíán tá ná saai noo ndéi ndó, dá kíán ná dá'a ni

kunda'í ini kee na kánian ki'o ña kadii iní. Ta kándéé ká'ano ini ña tá kadii ini yu'u sa'a ndo, dá kían kadii ta'ani ini mií ndó. ⁴ Ta nda'í nda'o ni sa kuu ini tá ni taai tuti ñoo kosaaan noo ndo, chi nda nío víi ni tar'u'u, xiní, ta xí'ín ndirá noo ni taai ña. Tído ko ní ndukúí ña dákúnda'í ini ndó. Di'a ni keei, dá kandaa ini ndo ndi ki'o kú'u ini sa'a ndo.

Kú'u ká'ano ini Pablo sa'á taa ni ya'a ni kee kuachi

⁵ Ió iin taa ni ya'a ni xi'o ña ni kunda'í ini yu'u, tído o duú sava'a iin tó'on yu'u ní kúnda'í ini kee ra, chi kuu va kaaí ña ndidaá ndo'ó ni kúnda'í ta'ani ini. ⁶ Sa kua'á nda'o ndó ni dandó'o nío taa ñoo. Cháa dión ka ni ná kakuuan. ⁷ Ña kánian kee ndó viti kían ki'o ká'ano ini ndo sa'a rá, ta ki'o ndó tandeé iní noo rá, dá kían ná dá'a ni kandeé ña kunda'í ini ra dánaá ñaá. ⁸ Sa'á ñoo seí nda'avíi noo ndo ña na'a tuku ndó ña kú'u ini ndo sa'a rá. ⁹ Chi ni tanda'í iin ka tuti ñoo kosaa noo ndo, dá ná kande'á á miían ndaa seídó'o ndó ndidaá choon sa'ándái noo ndo. ¹⁰ Chi na xí'o ká'ano ini ndo sa'a, ta nda yu'u ta'ani ki'o ká'ano ini sa'a ná. Ta sa ni xi'o ká'ano ta'ani ini sa'á taa ñoo tá ió iin ña'a ni kee ra xí'ín mií, ta sa'á mií ndó ni keei dión, chi ki'o dión kóni mií Cristo kee yó, ¹¹ dá kían ná dá'a ni kandeé ña u'u kexíxian xí'ín yó, chi sa ná'á vá yó táto'on ki'o mañaan.

Yó'o ni nakani ini Pablo sa'a Tito nani sa io na ñoo Troas

¹² Tá ni saai ñoo Troas dána'i to'on va'a sa'a Cristo, ndato ni sonó sato'o yo Ndios ña kían dána'i to'on na ñoo ñoo. ¹³ Tído ko ní sá io va'a ini, chi ko ní nani'i tá'in xí'ín ñani yo Tito ñoo ñoo. Sa'á ñoo ni ka'in ndisá'an xí'ín ñayuu ndéi ñoo, dá ni keei kua'in chí kuendá Macedonia.

Dáxinkoo va'a Ndios ndidaá ña'a ndó'o yó sa'á ña ndíko yo Cristo

¹⁴ Tído náki'oi ndivé'e noo Ndios, dá chi mií ná dáxinkoo va'a ndidaá ña'a ndó'o yó sa'á ña ndíko yo Cristo Jesús. Ta noo ndú'u ni xi'o na choon dána'a ndu sa'á to'on na, dá kían táto'on ki'o náka'ani díko támi sá'an, ki'o di'ón náka'ani to'on na noo ndidaá ñayuu. ¹⁵ Ta noo mí Ndios kúu ndu'u táto'on iin dusa támi sá'an, ña chí'no'o Cristo noo Ndios. Chi to'on dána'a ndu náka'ani kua'an noo na kua'an kaki, xí'ín noo na kua'an naá. ¹⁶ Ta to'on dána'a ndu kían táto'on díko ndi noo na kua'an naá, ña xí'o ña naá ná. Ta noo na kua'an kaki, to'on yó'o kían táto'on iin díko támi sá'an, ña xí'o ña kataki na. Tído, ¿ndá yoo kandeé kee choon yó'o, tá dáá? ¹⁷ Ta ko kée ta'on ndu'u táto'on kée kua'á nda'o taa, tá'an ra xionoo náka'an nda'i to'on Ndios xí'ín ña maña. Di'a ndís'ano kéchóon ndu noo Ndios, chi mií ná ni xi'o choon yó'o noo ndu, ta noo mí Ndios ká'an ndu sa'a Cristo.

Dána'a Pablo noó ñayuu ña ni kandoo Ndios kee na ña saá xí'in ná

3 ¹ ¿Á ká'an ndó ña nandió kuéi tuku ndu'u ndukú ndú ña nakoni ndo ndu'u sa'a ña ká'an ndu dión? O, ¿á ká'an ndó ña xínñó'ó ndú iin tuti chindeé ndú mií ndú noo ndo'ó, o iin tuti noo ká'an va'a mií ndó sa'a ndu táto'on ki'o xínñó'ó ñaá dao ka ra? Koó, ² dá chi tuti ká'an va'a sa'a ndú kúú iin rá iin mií ndo'ó, ta káaan ini nío ndú. Ta ndidaá tá'an ñayuu xí'o kuendá sa'a choon va'a ni kee ndu tein ndó xaan, ³ chi miían ndaa kuiti ndo'ó kúú tuti ká'an va'a sa'a ndu'u, ña kían ni taa mií Cristo, ña kían né'e ndu xionoo ndu. Ta ko ní taa naan noo iin tuti xí'in tinta. Di'a ni taa naan xí'in ndée Espíritu i Ndios takí. Ta ko ní taa naan noo yuu dá'ándá, di'a ni taa naan ini nío ndo.

⁴ Ta kándée ká'ano ini ndu'u Ndios ña ki'o dión kían sa'a ña ió Cristo xí'in ndú. ⁵ Ta ni lú'u ña ndichí ko kómí mí ndu'u ña kían kedaá xí'in ndú ka'an ndú ña katí'a ndu kee ndu choon yó'o, dá chi mií vá Ndios kúú na xí'o ña ndichí noo ndu, dá katí'a ndu kee nduan. ⁶ Ta mií Ndios kúú na ni xi'o ña kátí'a ndu dána'a ndu sa'a ña saá ni kandoo na kee na xí'in ñayuu na. Ta díin va kían o duú ley, ña ni taa na xí'in letra, chi noo Espíritu i mií ná ni kii ña saá ñoó. Ta ley ñoó xí'o ña kánian kuu ñayuu, tído Espíritu i, noón kúú na xí'o ña kataki chíchí yó.

⁷ Ta ley ñoó, tá'an ña xí'o ña kánian kuu yo, ni taa Ndios ña noó yuu. Ta ni naye'e ndaa tá ni xi'o naan noo Moisés. Ta ko ní kúu ta'on kande'é na ñoo Israel noo Moisés sa'a ña ndato téi yé'an, tído sa kua'an ndañó'ó vá ña yé'e noo ná. ⁸ Tído ndato ka ví naye'e ndaa tá kemáni Ndios yo xí'in Espíritu i ná. ⁹ Dá chi tá dión ndato ni naye'e ndaa tá ni xi'o na ley yatá, ña ká'an ña kúú yó ñayuu kómí kuachi noo Ndios, ví'í ka ví ndato ña saá xí'o Ndios noo yo, chi xí'oan ña kandoo vii yo noo ná. ¹⁰ Chi va'ará ndi ki'o ví ndato náye'e ndaa tá ni xi'o na ley yatá, tído ko ta'ón ña'a kían noo ña ndato téi náye'e ndaa xí'o Ndios noo yo viti. ¹¹ Dá chi ley yatá, ña naá, ndato ni sa ye'e ndaaan, tído ví'í ka ví ndato náye'e ndaa ña saá xí'o Ndios noo yo viti, chi ndidaá tá'an tiempo kooan.

¹² Ta sa'a ña ió tandee iní ndu ña ki'o dión kían, sa'a ñoó ko yu'ú ta'on ndu ka'an ndu sa'an, ¹³ ta ko kée ta'on ndu táto'on ki'o ni kee Moisés, chi ni dadá'i na noo ná xí'in iin dá'on, dá ná o koní na ñoo Israel ña sa kua'an nda'o ña ndato tóon noo ná. ¹⁴ Tído ni ndadi va ñaxintóni ñayuu ñoó. Ta nda na ndéi viti ndó'o ta'ani dión, chi tá ká'i na ley yatá, ió táto'on iin dá'on sadí ñaxintóni ná. Tído tá ná kandeé iní na Cristo, nda daá ví kexoo dá'on, ña sadí ñaxintóni ná. ¹⁵ Ta nda kuu viti ndó'o na dión, chi tá ká'i na ley Moisés ñoó, sadí i vá dá'on ñoó ñaxintóni ná. ¹⁶ Tído tá ná kandeé iní na sato'o yo Jesús, dá kían kexoo dá'on, ña sadí ñaxintóni ná. ¹⁷ Dá chi sato'o yo kúú Espíritu i Ndios, ta noo nákaa Espíritu i Ndios, ñoó kúú noo ni nono, koó ña'a ka ketéin. ¹⁸ Sa'a ñoó koó ka dá'on sadí noo yo, ta mií yó ná'a táto'on ki'o ndato yé'e sato'o

yo Ndios, táto'on kée iin espejo ná'a ndatoán táto'on káa yó. Chi iin rá iin kuu kuu náye'e cháá ka yo kua'an yo kooó táto'on ki'o ndato yé'e mií ná, ta ña yó'o kían kée na kúú Espíritu i Ndios, na kúú sato'o yo.

4 ¹ Ta sa'á ña ni xi'o Ndios choon yó'o noo ndú sa'á ña kú'u ini na sa'a ndú, sa'á ñoó ko kútúú ini ndu. ² Di'a kúñó'ó ndú ndidaá ña ka'an noo kéde'é dao ka ñayuu. Ta ko xionoo ndu dándá'í ndu ñayuu, ta ko nádaká ta'on ndu to'on tó'ón xí'ín to'on Ndios noo dána'a ndu. Di'a dána'a ndaa ndu, ta ñoó kían kedaá xí'ín ñayuu, dá ná o sa nákani kuáchí ini na kande'é ná ndu'u. Ta mií Ndios ná'á ña dión kían. ³ Ta to'on va'a dána'a ndu, ko kándaá ini dao ñayuu, chi ió iin ña'a sadi ñaxintóni ná. Ta ñayuu kua'an naá, noón kúú na ndadí ñaxintóni. ⁴ Ta ña u'u dándáki ñayuú yó'o viti, ta ñoó kían ni sadi ñaxintóni ñayuu ko xí'ín kandísa, dá kían ná dá'a ni natoon ñaxintóni ná kee to'on va'a ña ká'an sa'a ndi ki'o ká'ano choon kómí Cristo Jesús, na káa táto'on ki'o káa Ndios. ⁵ Ta ko xionoo ta'on ndu'u dána'a ndu sa'a míí ndú, di'a dána'a ndu ña iin tó'ón Jesucristo kúú sato'o noo ndidaá ña'a, ta ndu'u kúú na xínkuáchí noo ndidaá ndó sa'á ña kóni ndu Jesús. ⁶ Dá chi mií Ndios, na ni sa'anda choon, dá ni naye'e ndaa noo iin naá, noón ta'ani kúú na ni datóon ñaxintóni ndú, dión dá kuu datóon ndu ñaxintóni dao ka ñayuu, dá kana'á ná ndi ki'o ká'ano tatá Ndios, ta ná'a Ndios ña ndato yó'o xí'ín Jesucristo.

Ki'o di'a kée ndu sa'á ña kándéé iní ndu Jesús

⁷ Ta ndu'u kúú táto'on iin kidi ñó'o noo ñó'o iin ña kuiká, ña kúú to'on ndato dána'a ndu, dá ná kandaá ini ñayuu ña ndée ká'ano yó'o ni kii noo Ndios, ta o duú ndée kómí míí ndú kían. ⁸ Ta va'ará só'óni tandó'ó ndu'u, tído ko ní tadi ta'on ndu. Ta va'ará nákani nda'o ini ndu, tído ko ndí'i ta'on tandéé iní ndu. ⁹ Kéndava'a ñayuu xí'ín ndú, tído ko dáyaá ndá'a ta'on ñaá Ndios. Koon na ndu'u noñó'o, tído ko kándéé ta'on na dánaá na ndu'u. ¹⁰ Ndeí kúú míí vá noo xionoo ndu, daá kuití vá ió ña ka'ání ná yikí koño ndu táto'on ni kee na xí'ín Jesús, dá ná kandaá ini ñayuu ña ió takí Jesús sa'á ña náki'o ndu yikí koño ndu ndo'an dión. ¹¹ Chi xían nani takí ndu ndéi ndu, daá kuití vá ió nduu ndu naki'o ndu mií ndú kuu ndu sa'a Jesús, dá ná kandaá ini ñayuu ña ió takí na sa'á ña náki'o ndu yikí koño ndu ndo'an dión. ¹² Ta sa'á ña daá kuití ió ña kuu ndu, sa'á ñoó nónó noo ndo ni'i ndo ña kataki chíchí ndó.

¹³ Ta kándéé iní ndu Ndios táto'on ki'o ni kándéé ini ñaá na ni taa di'a noo tuti i Ndios: “Sa'á ña kándísa ndaa Ndios, sa'á ñoó ni ka'in sa'a ná.” Ki'o dión ta'ani ndó'o ndu'u, chi sa'á ña kándísa ndu na, sa'á ñoó ká'an ndu xí'ín ndó sa'a ná, ¹⁴ dá chi ná'á ndú ña ni nataki sato'o yo Jesús ni kee Ndios, ta kándísa ta'ani ndu ña dánátaki na ndu'u táto'on ni kee na xí'ín Jesús, dá nakuíta dáó yó noo ná. ¹⁵ Chi xí'o ndu mií ndú ña ndó'o ndu ndidaá tandó'ó yó'o sa'á ña kú'u nda'o ini ndu sa'a ndo,

dión, dá ná ndukua'a cháá ka ñayuu natiin ña maní xí'o Ndios, dá kían kua'a cháá ka ñayuu nakí'o ndivé'e noo Ndios, dá ná natiin na cháá ka ñañó'ó.

¹⁶ Sa'á ñoó ko kútúú ta'on ini ndu, va'ará sa kúyatá yikí koño ndu kua'an, tído iin rá iin kuu kuu di'a ndúsaá nío ndú kua'an. ¹⁷ Dá chí tandó'ó ló'o, ña ndó'o tóo nío ndú ñayuú yó'o, ñoó kían xí'o ña ni'i ndú iin ña ndato ká'ano noo Ndios, ña ni iin kuu o ndí'i. ¹⁸ Ta ko ndí'i ta'on ini ndu sa'á ña ndé'á xí'ín noo yo. Di'a ndí'i ini ndu sa'á ña ko túu, ña ko xíní yo xí'ín noo yo. Dá chí ña ndé'é yó xí'ín noo yo, ñoó kían ndi'i va. Tído ña ko xíní yo xí'ín noo yo, ñoó kían ni iin kuu ta'ón o ndí'i.

5 ¹ Dá chí ná'á ndu'u ña yikí koño ndíxi ndu kúú táto'on iin ve'e ndéi tóo ndu ñayuú yó'o. Ta tá ná kasandaá kuu natanián, dá ko'on Ndios kí'o na iin ve'e kandeí ndu, ña kían ko ní káva'a xí'ín ndá'a taa, ña ni iin kuu o ndí'i, ña kúú kuendá induú. ² Sa'á ñoó nda'í tána ndu, chí kóni kí ndu nandixi ndu yikí koño saá, ña kúú kuendá induú. ³ Kí'o dión, dá nandixi ndu iin yikí koño saá, dá o koo vichí ndú. ⁴ Ta nani ndíxi ndu yikí koño yó'o, nda'í tána ndu, dá chí ko kóni ta'on ndu kandoo vichí ndú. Di'a kóni ndu ña nandixi ndu iin yikí koño saá, dá kían naá yikí koño xí'i yó'o, dá ni'i ndú iin yikí koño ña kataki chíchí. ⁵ Ta mií Ndios kúú na ni saki ña dión kee na xí'ín ndú, ta ni xí'o na Espíritu ná noo ndú, dá ná kandaá ini ndu ña miían ndaa dión kee na xí'ín ndú.

⁶ Sa'á ñoó daá ió tandee iní ndu noo ña yó'o, ta ná'á ndú ña xían nani ndíxi ij ndú yikí koño yó'o, xíká vá ndíta ndu noo ió sato'o yo Jesús. ⁷ Xíonoo ndu xí'ín ña kándée iní ndu ña kí'o dión kían, ta ko ndí'i ini ndu sa'á ña xíní ndu xí'ín noo ndú. ⁸ Tído kándée ká'ano ini ndu ña dión koo, sa'á ñoó kóni cháá ka ndu dánkoo ndu yikí koño yó'o, dá kuu nakuíta ndu noo sato'o yo Jesús. ⁹ Sa'á ñoó ndí'i ini ndu, á mií ndú ndéi xíká ndú noo ná o á mií ndú sa ndíta ndu noo ná, ña kóni ndu kían nata'an ini na xíní na ña kée ndu. ¹⁰ Dá chí miían ndúsa nakuíta ndidaá tá'an yó noo Cristo Jesús, noo koo na keyíko na, dá natiin iin rá iin yó ya'i sa'á ña ni kee yó nani ni sa ndixi yó yikí koño yó'o, á mií yó ni kee yó ña va'a, o á mií yó ni kee yó ña kini.

Ni xí'o Ndios choon noo ndú ña dánaki'in tá'an va'a ndu ñayuu xí'ín Ndios

¹¹ Ta sa'á ña ná'á ndú ña kánian yu'ú ni'ini yó na kúú sato'o yo, sa'á ñoó ndí'i ini ndu dáxino ini ndu ñayuu, dá kandísa na ña ndaa dána'a ndu. Ta mií Ndios kúú na ná'á va'a táto'on kí'o kúú ndú, ta kándée iní ndu ña kí'o dión ta'ani kátóni ini ndo. ¹² Tído ná dá'a ni ka'án ndó ña nandió kuéi ndu chinaní va'a ndu mií ndú noo ndo, di'a kóni ndu ña ni'i ndo ña ka'an va'a ndó sa'a ndú'u, dá kían nónó noo ndo ka'an ndo xí'ín ñayuu kátoó chíndaya'ii mií sa'á ña luu ká'an na, tído yakó nda'o nío

ná. ¹³ Chì tá ká'an dao ndó ña lóko kúú ndú, dá kían lóko va kúú ndú sa'á Ndios, tá dáá. Tído tá ká'an ndó ña kéndísá'ano ndu, dá kían ña va'a mií vá ndó kían. ¹⁴ Ta kú'u nda'o ini Cristo sa'a ndú, ta ñoó kían kedaá, sa'á ñoó ndí'i ini ndu kéchóon ndu noo ná, chì ná'á ndú ña sa'á ña nì xi'i mií ná sa'a ndidaá ñayuu, sa'á ñoó nì xi'i ndidaá ñayuu. ¹⁵ Nì xi'i Jesús sa'a ndidaá ñayuu, dá kían ná dá'a ka ni kandeí yó keeá ña kóni mií yó. Di'a kánian kandeí yó kee yó ña kóni na nì xi'i sa'a yo, ta nì natakí na.

¹⁶ Sa'á ñoó ko nákaní ka ini ndu sa'á ñayuu táto'on kí'o nákaní ini ñayuu ko ná'á Ndios. Ta va'ará nì sa ka'an ndú ña iin ta oon nì sa kuu Cristo, tído viti ko nákaní ka ini ndu dión sa'a ná. ¹⁷ Dá chì ndi ndáa miíó ñayuu ñó'o tixi ndá'a Cristo, nì nduu na iin ñayuu saá. Ta ndidaá ña nì sa kuu na tá sata nì kandoo vaan, ta ndidaá ña nì nduu saá. ¹⁸ Ta ndidaá ña yó'o kée mií Ndios, na nì naki'in tá'an va'a xí'ín yó sa'á ña nì kee Cristo. Ta nì xi'o na choon noó ndu'u ña kían dána'a ndu noó ñayuu ndi kee na, dá naki'in tá'an va'a Ndios xí'ín ná. ¹⁹ Chì sa'á ña nì kee Cristo, sa'á ñoó kuu naki'in tá'an va'a Ndios xí'ín ñayuu, chì ko taó kuendá ta'on ka na sa'á kuachi kée ñayuu. Ta nì sa'anda na choon noó ndu ña dána'a ndu noó ñayuu ndi kee na, dá naki'in tá'an va'a Ndios xí'ín ná. ²⁰ Ta ndu'u kúú na nì chikata Cristo kane'e ndu to'on na noó ñayuu, sa'á ñoó kéchóon Ndios ndu'u, dá ká'an ndu xí'ín ñayuu. Sa'á ñoó seí nda'í ndu noo ndo'ó xí'ín kuu Cristo ña koo ini ndo naki'in tá'an va'a ndó xí'ín Ndios. ²¹ Ta Cristo kúú na ko ní ya'a ta'on kee kuachi, tído nì nakuido na kuachi yó, dión, dá nì kandoo yó kúú yó ñayuu koó kuachi noo Ndios sa'á ña nì kee na dión.

6 ¹ Ta viti ndu'u kúú na kéchóon xí'ín Cristo, sa'á ñoó ká'an ni'ini ndu noo ndo ña ná dá'a ni koo ini ndo natiin oon ndó ña maní nì kee Ndios xí'ín ndó. ² Dá chì di'a kaá tuti iì Ndios:

Mií kuu nì kaxii, kuu dáá nì seídó'i ndo'ó.

Chì tá nì kasandaá kuu nì dakákii ndo'ó,

kuu dáá nì chindeéi ndo'ó.

Ta kuu víti kúú kuu nì kaxi Ndios, chì mií kuu víti kóni na dáka'ki na ndo'ó.

³ Ta ni iin tó'on ña'a nóo ko yá'a ndu kee ndu noo ni iin tó'on ñayuu, dá kían ná o ní'i ná ndi koo ka'an ndava'a na sa'a choon nì xi'o Ndios noo ndú. ⁴ Di'a ná'a ndu mií ndú noo ndidaá ña kée ndu ña kúú ndú na kéchóon ndaa noo Ndios, dá chì xí'o ndeé nda'o ini ndu, va'ará ndó'o ndu tandó'ó sa'a choon kée ndu, o va'ará kámani ña'a noo ndú, ta dión ta'ani kée ndu tá ndó'o níó ndú. ⁵ Ta xí'o ndeé ta'ani ini ndu va'ará káni na ndu'u, o va'ará sadí na ndu'u ve'e kaa, o va'ará kua'á ñayuu ndákuei naá xí'ín ndú, o va'ará choon ndeé nda'o kée ndu, o va'ará ko kídí ndu dao sakuáá, o va'ará ko ní'i ndú ña'a kasá'an ndu dao ta'ándá. ⁶ Ta noo choon kée ndu, vii kée ndu, ta kéchóon ndu ña ndichí xí'o Ndios, ta ió

kueé ini ndu, ta va'a ini ndu, ta xí'ín ndée Espíritu ij Ndios kéchóon ndu, ta kú'u ndisa ini ndu sa'a ndidaá ñayuu, ⁷ ta dána'a ndu to'on ndaa, ta xí'ín ndée mií Ndios kée ndu ndidaá ña'a, ta né'e ndu ña kúú ña ndaa xí'ín ndá'a kuá'a ndu, xí'ín ndá'a íti ndu, dá chindeé ndú mií ndú. ⁸ Ió dao ñayuu xí'o ñañó'ó noo ndú, ta ió dao ka na koó ñañó'ó ná noo ndú. Ta dao na chínani kini na ndu'u, ta dao ka na chínani va'a ñaá ná. Ta va'ará chínani tó'on ná ndu'u, tído na ndaa va kúú ndú. ⁹ Ta ió dao ñayuu kée na ña ko nákonni na ndu'u, tído ná'á vá ná ndu'u. Sa ndij va kúú ndú xiní ndu, tído takí ij vá ndú. Ta va'ará kéndava'a kini na xí'ín ndu'u, tído ko xí'i ta'on ndu. ¹⁰ Ta va'ará ndúkú ñayuu ña kandeí nda'í ndu, tído daá kádij iní ndu. Ta va'ará kúnda'í ndu, tído di'a ndekuíká ndú ñayuu xí'ín to'on Ndios. Ta va'ará ni ña'a ta'on koó noo ndú, tído di'a kómí ndú ndidaá ña va'a cháa ka.

¹¹ Ni nono yú'u ndú ni ka'an ndaa ndu xí'ín ndó, na ñoo Corinto xaan, ta ndino'o ini ndú xí'ín níó ndú ni ka'an ndu xí'ín ndó. ¹² Ko ní sadí ndu níó ndú noo ndo'ó, mií di'a ndó kúú na ni sadi níó ndo noo ndu'u. ¹³ Ta kóni ndu ña kee ndó xí'ín ndú táto'on ki'o ni kee ndu xí'ín ndó, sa'á ñoó seí nda'í ndu noo ndo táto'on kée iin tatá xí'ín de'e ra ña konó ta'ani ndó níó ndo noo ndú'u.

Yóó kúú ve'e ño'o Ndios takí

¹⁴ O sa kóo ini ndo naki'in tá'an nóó ndó xí'ín ñayuu ko kándisa Jesús. Dá chi, ¿á náki'in tá'an nóó ña ndaa xí'ín ña ko ndaa, ká'an ndó? Ta, ¿á náki'in tá'an nóó noo tóon xí'ín noo íin naá? ¹⁵ Ta, ¿á kuu naki'in tá'an nóó Cristo xí'ín ña u'u? Ta, ¿á kuu naki'in tá'an nóó iin na kándisa Jesús xí'ín iin na ko kándisa? ¹⁶ Ta, ¿á kuu naki'in tá'an nóó ve'e ño'o Ndios takí xí'ín ña kúú yoko, ká'an ndó? Ta yóó kúú ve'e ño'o noo ió Ndios takí, chi di'a kaá mií ná noo tuti ij ná:

Kooi xí'ín ná, ta kanooi tein na.

Ta yu'u kakuu Ndios noo ná,
ta mií ná kakuu na ñooi.

¹⁷ Ta sa'á ña dión kían, sa'á ñoó kaá ta'ani na di'a:

Kankuei ndó tein ñayuu ko kándisa xaan,
ta kuxoo ndó kua'án ndo, kaá Ndios, na kúú sato'o yo.
Ta ni o sa káko'on ndá'a ndo ña kini kée na,
dá kían natiin va'i ndo'ó.

¹⁸ Ta yu'u ná kakuu tatá noo ndo,
ta ndo'ó ná kakuu de'e yíi yu'u xí'ín de'e di'íi,
kaá Ndios, na kúú sato'o yo, na kómí ndidaá tá'an choon.

7 ¹ Na maní miíi, ki'o dión ví ndato ni xi'o Ndios to'on na noo yo, sa'á ñoó ná taó yo mií yó noo ndidaá tá'an ña dáyakó ñíi yo xí'ín ñaxintóni yo noo Ndios. Ta dión, dá ná kasandaá yo koo vii yo noo mií ná sa'á ña yu'ú ni'ini yó na.

Káadij ini Pablo ña ni nandikó iní na ñoo Corinto sa'á kuachi ni kee na

² Natiin va'a ndó ndu'u xí'ín ndino'o ini ndo, dá chi ni iin tó'ón ndó ko ní dár'u'u ndu, ta ni iin tó'ón ndó ko ní dákí'in ndu iin íchi kini, ta ni iin tó'ón ndó ko ní dándá'í ndu. ³ Ta ko ká'in dión, dá ka'an kuachii sa'a ndo, chi sa ni ka'in xí'ín ndó ña nda maá ini nio ndú ñó'o ndo'ó. Sa'a ñoo iin kakuu yó tá ni xi'i yo, ta iin kakuu yó tá takí yo. ⁴ Ta ió nda'o tandeé ini ká'in xí'ín ndó ña nákanini, ta va'a nda'o ká'in sa'a ndo noo dao ka ñayuu. Ta ni nakutí xí'ín tandeé iní, ta ni nakutí ndaa nio ndú xí'an kadii ini ndu tein ndidaá tandó'ó ndó'o ndu.

⁵ Chi tá ni kasaa ndu Macedonia yó'o, ni lú'u ko ní náni'i ndée ndú, dá chi ndeí kúu míi vá noo ni xionoo ndu ni ndo'o nda'o ndu, chi ni dandó'o ñayuu nio ndú, ta ni sa yu'ú ni'ini nio ndú. ⁶ Tído míi Ndios, na xí'o tandeé iní noo na ndó'o nio, noón kúu na ni xi'o tandeé iní noo ndu'u sa'a ña ni ndisaa Tito. ⁷ Ta o duú sa'a ña ni ndusaa oon ni xi, dá chi ni natiin ta'ani ndu tandeé iní sa'a ña ni xi'o ndó tandeé iní noo xí, chi ni nakani xi ña ndáti kí ndo koni tuku ndó yu'u, ta ni nakani ta'ani xi ña kúnda'í nda'o ini ndo sa'a kuachi ni kee ndó, ta ndí'i ini ndo sa'a yu'u. Sa'a ñoo ni kadii cháa ka inii. ⁸ Dá chi va'ará ni dakúnda'í ini ndo'ó xí'ín tuti ni taai kosaa noo ndo, tído ko kútúu ta'on inii viti noo ña ni taai ni saa noo ndo. Chi va'ará ni kutúu inii tá ni taai ña, tído viti kánda inii ña tóo vá ni kúnda'í ini ndo ni kean. ⁹ Ta viti kadii inii, tído ko kadii ta'on inii sa'a ña ni dakúnda'í ini ndó. Di'a kadii inii, dá chi sa'a ña ni kúnda'í iní ndo, ñoo ni kedaá xí'ín ndó, dá ni nandikó iní ndo sa'a kuachi ni kee ndó. Chi míi vá Ndios kúu na ni xi'o ña ni kúnda'í iní ndo sa'a kuachi ni kee ndó. Sa'a ñoo ni lú'u ko ní tuú ndó ni kee ndu.

¹⁰ Dá chi tá xí'o Ndios ña kúnda'í iní yo sa'a kuachi kée yó, ñoo kían kedaá xí'ín yó, dá nandikó iní yo sa'a ña ni kee yó, dá ni'i yo ña káki yó. Sa'a ñoo ko kánian ta'u'u ini yo tá ndó'o yó dión. Tído ña kúnda'í ini xí'o ñayuu yó'o, ñoo kían xí'o ña naá yó. ¹¹ Tído kande'é ndó, chi sa'a ña ni xi'o Ndios ña ni kúnda'í iní ndo, ñoo ni kedaá xí'ín ndó, sa'a ñoo ndi kí'o ví ni ndí'i ini ndo kee ndó ña kóni míi ná, ta ni ndí'i ini ndo ndeyíko ndo choon, ta ni ta'u'u ini ndo ni xini ndo kuachi ñoo, ta ni yu'ú ndo ni xini ndoán, ta ndi kí'o ví ni katoó ndo koni ndo yu'u, ta ni ndí'i cháa ka ini ndo ni kee ndó choon ni sa'andai noo ndo, ta ni dandó'o ndó nio taa ni kee kuachi ñoo. Ta noo ndidaá ña yó'o ni na'a ndo ña ni kenda ndo choon. ¹² Tá ni taai tuti ñoo kosaaan noo ndo, ko ní táai ña, dá keyíko ndo sa'a ra ni ya'a ni kee kuachi, ta ni ko ní táai ña kosaaan chindeéan na ni ta'u'u. Di'a ni taai ña kosaaan noo ndo, dá na'a ndo míi ndó noo Ndios ña ndí'i ini ndó kee ndó choon sa'ándá ndu.

¹³ Ta sa'a ña ni kee ndó dión, sa'a ñoo ni nduká'ano cháa ka tandeé iní ndu. Tído ni kadii cháa ka ini ndu sa'a ña ni kadii nda'o ini Tito, chi ni natiin xi tandeé iní ká'ano ni kee ndidaá ndo'ó. ¹⁴ Chi ni ka'in xí'ín xí ña

va'a kee ndó xí'ín xí, ta kọ ní xíka'an ta'on nooí sa'á ña nì ka'in dión xí'ín xí. Chì táto'on kị'o ká'an ndu ndino'o ña ndaa xí'ín ndó, kị'o dión ta'ani nì xinkoo ndaa ndidaá ña nì ka'an va'a ndu sa'a ndo noo xí. ¹⁵ Ta nì nduká'ano cháá ka ña kú'u ini xí sa'a ndo, chì ndísaá ini xí táto'on kị'o nì seídó'o ndidaá ndó choon nì ta'andá noo ndo, chì nì natiin va'a ndó xí xí'ín ña yu'ú ndo, ta xí'ín ña ndéi nino ndó. ¹⁶ Ta kádii nda'o inii, chì noo ndidaá ña'a kándéé inii ndo'ó.

Yó'o ká'an Pablo sa'á di'ón dátaká na kua'an noo na ndó'o nío

8 ¹ Ta viti, ñani, kóni ndu nakani ndu xí'ín ndó sa'á ña manì kée Ndios xí'ín ndidaá na kúu kuendá Jesús ndéi chí Macedonia. ² Chì va'ará nì xirndodó ñaá tandó'ó, tído kádii nda'o ini na, ta va'ará kúnda'í nda'o na, tído kua'á nda'o di'ón nì doko ná. ³ Ta yu'u xí'o ndaa kuendá sa'a ná, ña ndino'o ini ná nì xí'o na di'ón táto'on kị'o sáa ndée ná, ta nì ya'a cháá ka ví nì xí'o na noo ña sáa ndée ná. ⁴ Ta nì seí nda'í nda'o na noo ndu'u ña ná kandía ndu tiin ndu di'ón nì dátaká na, dá kuu chindee ná ñayuu kúnda'í, na kúu ñayuu Ndios. ⁵ Va'a cháá ka ví nì kee na noo ña ndáti ndu kee na, dá chì dinñó'ó nì nakị'o na mií ná noo ndá'a sato'o yo Jesús. Nì ndi'i, dá nì nakị'o na mií ná kueídó'o na ndu'u táto'on kị'o kóni mií Ndios. ⁶ Sa'á ñoó nì ka'an ni'ini ndu noo Tito ña táto'on kị'o nì chindeeé xí ndo'ó tá nì kasá'á ndó kétútí ndó di'ón chindeeé ndó na kúnda'í ñoó, kị'o dión ta'ani ná dáxinkoo xi choon noo ña manì kee ndó yó'o. ⁷ Va'a kée ndó noo ndidaá ña'a, chì kándéé ká'ano iní ndo Jesús, ta tì'a ndó ka'an va'a ndó, ta ndichí ndo noo ña'a Ndios, ta ndino'o ini ndo kée ndó ndi ndáa mií vá choon, ta kú'u nda'o ini ndo sa'a ndú. Sa'á ñoó koo ini ndo kee va'a ta'ani ndó noo ña manì yó'o.

⁸ Ta ña ká'in xí'ín ndó, kọ kían iin choon sa'ándái noo ndo. Di'a kónii ña kande'é va'a ndó táto'on kị'o ndí'i ini dao ka ñani yo chindeeé ná na kámani ña'a noo, dá ná kande'á á miían ndaa ío ña kú'u ini ndo sa'á ñayuu ndó'o dión. ⁹ Ta sa na'á vá mií ndó sa'á ña manì nì kee Jesucristo, na kúu sato'o yo, sa'a yo, dá chì sa'á ña kú'u nda'o ini na sa'a, sa'á ñoó nì ndee na mií ná iin taa kúnda'í, va'ará kuíka nda'o na. Ta sa'á ña nì ndenda'í na mií ná, sa'á ñoó ni'i yo ña koo kuíka yó noo Ndios. ¹⁰ Ta viti kóni yu'u ka'an ni'inii noo ndo sa'á ña yó'o. Chì kánian dáxinkoo ndó choon yó'o viti, chì nda kua'á ao nì kasá'á ndó kétútí ndó di'ón ñoó, ta o duú ña yó'o oon ni ní kee ndó, chì mií ndó nì ndaki ini ña dión koo.

¹¹ Sa'á ñoó dáxinkoo kii ndo choon yó'o, chì táto'on kị'o luu nì chikaa ini ndo kee ndóan mií sa'a, kị'o dión ndi'i ini ndo dáxinkoo ndóan viti. Ta kị'o ndóan táto'on kị'o ío ña noo ndo. ¹² Chì tá ná kị'o ndóan xí'ín ndino'o ini ndo, dá kían nata'an ini Ndios koni naán, chì kọ xíka ta'on na ña kị'o yó ña koó noo yo.

¹³ Ta kọ ká'an ta'on yu'u ña yó'o xí'ín ndó sa'á ña kónii ña kande'i va'a dao ka ñayuu, dá kandoo ndá'a ndo. ¹⁴ Di'a kóni yu'u ña chindeeé tá'an

yó tá kamani ña'a noo yo, chi tiempo viti kánian koto ni'ini ndó na kúnda'í ñoó xí'ín ña kándoo noo ndo, dá chindeé ndó na xí'ín ña kámani noo ná. Dión, dá ná nandió kuéi na chindeé ná ndo'ó xí'ín ña xínño'ó ndó ió noo ná, dión, dá chindeé tá'an yó tá kámani ña'a noo yo. ¹⁵ Dá chi di'a kaá tuti iñ Ndios: “Ñayuu ni ndítútí kuá'á ña'a, ta ko ní kándoo ta'an vaan. Ta na ni ndítútí lú'an, ko ní kámani ta'an vaan.”

¹⁶ Tído ndivé'e Ndios, chi mií ná ni kedaá xí'ín Tito, sa'á ñoó ndí'i ini xi sa'a ndo tátó'on ki'o ndó'o mií. ¹⁷ Chi xí'ín ndino'o ini xi ni natiin xi choon ni xi'o ndu noo xí. Ta sa'á ña ndí'i ini xi sa'a ndo, sa'á ñoó kosaa xi noo ndéi ndó, chi ki'o dión ni chikaa ini mií xí. ¹⁸ Ta ni tanda'á ta'ani ndu iin ka ñani yo kosaa ra xí'ín xí, ta ndeí kúú mií vá noo ndítútí na kúú kuendá Jesús ká'an va'a na sa'a rá, chi kéchóon va'a ra noo to'on va'a ká'an sa'a Jesús. ¹⁹ Ta o duú dión oon ni kían, taa yó'o kúú ra ni kaxi dao ka na kúú kuendá Jesús ña kían kane'e tá'an ra kanoo ra xí'ín ndu'u natiin ndu di'ón, ña ni ketútí dao ka ñani yo. Ta kee ndu choon yó'o, dá ná natiin sato'o yo ñañó'ó, dá kandaá ini ndo ña kóni ndu chindeé ñaá ndú noo choon yó'o. ²⁰ Ta ki'o dión ni chikaa ini ndu, dá kían ni iin tó'ón ñayuu ná dá'a ni nakani kuáchi ini kande'é ná ndu sa'á di'ón kua'a ni ndítútí ná kane'e ndu ko'on ndu. ²¹ Chi ndí'i ini ndu kéndísá'ano ndu choon. Ta o duú noo sato'o yo Jesús oon ni ndí'i ini ndu kee ndu dión, nda noo ñayuu ta'ani ndí'i ini ndu kéndísá'ano ndu.

²² Ta tanda'á ta'ani ndu iin ka ñani yo kosaa ra xí'ín taa yó'o. Ta kuá'á nda'o ta'ándá ni na'a ra mií rá noo ndú ña ndí'i nda'o ini ra kendaá ra choon. Ta viti ndí'i cháá ka ini ra chindeé rá ndo'ó, chi ió nda'o tandéé iní ra xí'ín ndó. ²³ Ta kana'á ndó ña Tito kúú ra né'e tá'an xí'ín yu'u, ta kéchóon dáó xí xí'ín noo ndo'ó. Ta uu ka ñani yo kosaa xí'ín xí kúú ra ni tanda'á dao ka na kúú kuendá Jesús kosaa ra, ta xí'ín taa yó'o natiin Cristo ñañó'ó. ²⁴ Ta na'a ndo mií ndó noo taa yó'o ña kúú ndó na kú'u ini sa'a na kúnda'í ñoó, dá ná kandaá ini dao ka na kúú kuendá Jesús sa'á ña va'a ni kee ndó, dá ná dá'a ni dátuu ndó ndu'u noo ká'an va'a ndu sa'a ndo noo rá.

9 ¹ Ko xínño'ó ka ka'in xí'ín ndo'ó sa'á di'ón, ña kían ketútí dao ka na kúú kuendá Jesús, dá chindeé ná ñayuu Ndios ndéi kuendá Judea, ² chi sa na'á vái ña ndino'o ini ndo kóni ndo chindeé ndó na. Ta ká'an va'i sa'a ndo'ó noo ñani yo ndéi Macedonia yó'o, chi ká'in xí'ín ná ña ndo'ó, na ndéi Acaya xaan, nda kuia ao ió nduu ndo chindeé ndó ñayuu kúnda'í. Ta sa'á ña ni ndí'i ini ndo kee ndó dión, sa'á ñoó ni chikaa ta'ani ini na kee na dión. ³ Tído ni tanda'í ñani yo yó'o kosaa ra noo ndéi ndó, dá kían ná dá'a ni kandoo tó'ín noo ña ni ka'an va'i sa'a ndo sa'a choon yó'o, dá ná xinkoo ña ni ka'in xí'ín ná ña kandeí nduu ndo. ⁴ Dá chi oon ni ví saa dao na ndéi Macedonia xí'ín, ta koni na ña ko ndéi nduu ndo xí'ín di'ón ñoó, dá kían kaka'an nda'o noo ndú'u sa'á ña ni kandeé iní ndu ndo'ó, ta ko ní sá ndei nduu ndo. Tído ví'í ka ví

kaka'an noo mií ndó. ⁵ Sa'á ñoó ni chikaa iniñ ña va'a cháá ka ni seí nda'í noó taa yó'o ña kosaa ra noo ndéi ndó dinñó'ó, dá chindeé rá ndo'ó ketútí ndó di'ón, ña ni kaa ndo ki'o ndó. Ta dión, dá ná kandeí nduu ndo ki'o ndóan xí'ín ndino'o ini ndo, dá ná dá'a ni kakian ña ni kendúsa ndu xí'ín ndó.

⁶ Ta ká'in xí'ín ndó ña kande'é ndó táto'on ndó'o na xíti, chi na xíti cháá, cháá vá dákée na. Ta na xíti kua'a, kua'a dákée na. ⁷ Ta iin rá iin ndó ki'o táto'on ki'o ni chikaa ini nio ndo. Ta o sa kí'o ndóan xí'an kúnda'í ini ndo, ni sa'á ña miían ndúsa ki'o ndóan. Chi náta'an ini Ndios xiní na na xí'o ña xí'an kádií ini na. ⁸ Ta na ká'ano nda'o kúú Ndios, sa'á ñoó kuu va ndekua'a ná ña'a va'a noo ndo, dá kían ni iin tó'ón ta'on ña'a ná o kómani noo ndo, dá kían ná koo ni ña'a chindeé ndó dao ka na. ⁹ Dá chi di'a kaá tuti ií Ndios:

Ni dasá rá ña ió noo rá, ta ni xi'o raan noó na kúnda'í, ta iin ni kandoo va ña ndaa ni kee ra noo Ndios.

¹⁰ Ta mií ná xí'o tata noó ra xíti, ta xí'o ta'ani na pan noó na kuíko, ta mií ná ndekua'a tata ió noo ndo. Ta ndekua'a ta'ani na ña va'a kee ndó xí'ín dao ka ñayuu. ¹¹ Dión, dá koni ndo koo kua'a ña'a noo ndo, dá kuu ki'o kua'a ndo ña'a noó ñayuu xínñó'án. Dá tá ná naki'o ndu di'ón ñoó noo ná, dá kían naki'o na ndivé'e noo Ndios sa'án. ¹² Chi tá ná naki'o ndu di'ón yó'o noó na kúnda'í ñoó, o duú ña'a xínñó'ó oon ni ñayuu Ndios ni'i ná xí'án, dá chi di'a kua'a nda'o noo ndivé'e naki'o na noo Ndios sa'án. ¹³ Ta sa'á ña natiin na di'ón ni kemáni ndo ná, sa'á ñoó keká'ano na Ndios, chi miían ndaa seídó'o ndó to'on va'a sa'a Cristo. Ta keká'ano ta'ani na Ndios sa'á ña ni xi'o ndó kua'a nda'o di'ón ni chindeé ndó mií ná xí'ín dao ka ñayuu. ¹⁴ Ta ki'o dión ta'ani kaka na ña maní noo Ndios sa'a ndo, chi kú'u nda'o ini na sa'a ndo, chi mií Ndios ni kedaá xí'ín ndó, dá ni kee ndó ña maní ká'ano yó'o xí'ín ná. ¹⁵ Ta ndivé'e ká'ano Ndios, chi ká'ano nda'o ña maní ni kee na xí'á. Ta ko ní'i yo to'on va'a ka'an yo sa'án.

Ká'an Pablo sa'a choon ni xi'o Ndios noo ná

10 ¹ Ta yu'u Pablo seí nda'í va'i noo ndo xí'ín ña nda'í ió iniñ, xí'ín ña ió va'a iniñ táto'on ki'o ni kee mií Cristo, va'ará ká'an dao ndó ña iin taa vitá iní kúú yu'u tá nákaaí tein ndó xaan, tído tá nákaa xíkái, deén nda'o ká'in xí'ín ndó. ² Tído seí nda'ávijí noo ndo ña tá ná saai, ná dá'a ni kendúsa ndo xí'ín ña ka'an deén xí'ín ndó, chi miían ndaa kuiti kosaa nduui ka'an deén xí'ín na ká'an ña xionoo ndu kée ndu táto'on ki'o kée ñayuu kuendá ñayuú yó'o. ³ Miían ndaa ndéi ndu ñayuú yó'o, tído ko kéchóon ta'on ndu ña'a ió ñayuú yó'o, dá naá ndu xí'ín ña kini. ⁴ Chi ko kéchóon ta'on ndu ña ió ñayuú yó'o, dá naá ndu xí'ín ña kini. Chi nda'á chóon, ña kían kéchóon ndu, kúú ndée xí'o mií Ndios. Ta xí'ín ña yó'o dánaá ndu noo dándáki ña kini. ⁵ Ta xí'ín ndée

yó'o ta'ani dátuu ndú ndidaa ña to'ón kéchóon ñayuu. Ta dátuu ta'ani ndu ndidaa ñaxintóni táyíí, ña kedaá xí'ín ná, dá kọ nákoní na Ndios. Ta náchi'i ndu ndidaa ñaxintóni ñayuu tixi ndá'a Cristo Jesús, dá ná kueídó'o ñaá ná. ⁶ Ta ió nduu ndu dándó'o ndu nío na kọ xí'ín kueídó'o tá ná kasandaá ndo kueídó'o ndisa ndó to'on Ndios.

⁷ Kande'é va'a ndó ndi káa iin rá iin ña'a. Tá ió iin káa ndó nákoní mií ña kúú ndó kuendá Cristo, dá kían kánian taó kuendá va'a ndó, chí tító'on kị'o kúú ndó kuendá Cristo, kị'o dión ta'ani kúú ndu'u. ⁸ Chí va'ará yá'i cháá noo chíndaya'ii choon né'i, tído kọ xíka'an ta'on nooí, chí mií sato'o yo Cristo ni xị'o choon yó'o nooí, dá dákuá'anoi ndo'ó noó ña kándisa ndó. Ta kọ ní xị'o na ña nooí ña dánaái noo ndo. ⁹ Ta o sa ká'án ndó ña ndúkúí dáyú'íi ndo'ó xí'ín to'on ká'ín noo tuti tánda'í kosaa noo ndo. ¹⁰ Chí kaá dao ndó ña miían ndaa deén nda'o ká'ín noo tuti táai tánda'í kosaa noo ndo, ta kuáchị nda'o choon sa'ándái noo ndo. Tído tá iói xí'ín ndó, kọ kúú ta'on yu'u iin taa ndeé iní, ta ni kọ tí'ai ka'an va'i, kaá dao ndó. ¹¹ Tído ká'ín xí'ín na ká'an dión ña ná kana'á ná ña tító'on kị'o ká'an ndu noo tuti táa ndu, kị'o dión ta'ani kee ndu tá ná saa ndu noo ndéi ndó xaan.

¹² Ta kọ chíndaa noó ndu ki'ín tá'an ndu xí'ín ta kátoó chíndaya'i mií, ta ni kọ chídáó tá'an ndu mií ndú xí'ín rá. Tído taa yó'o, ndéi ra chíkị'ó ra mií rá xí'ín ña kée ra, ta chídáó rá mií rá xí'ín ra kée tító'on kée mií rá. Ta sa'á ña kée ra dión, sa'á noó kọ ñó'o ndi'i ta'on ini ra. ¹³ Tído ndu'u, kọ yá'a ta'on ndu chíndaya'i ndu mií ndú cháá ka noó choon né'e ndu. Di'a chíndaya'i ndu mií ndú tító'on káa choon ni xị'o mií Ndios noo ndú, ta xí'ín choon yó'o ni kasandaá ndu noo ndéi ndó. ¹⁴ Kọ yá'a ta'on ndu tá sa'ándá ndu choon noo ndo, chí yá'a ndu tá kọ ní saa ndu noo ndéi ndó. Tído ndu'u kúú ra mií noó ni saa ni daná'a to'on va'a sa'a Cristo Jesús noo ndo. ¹⁵ Ta kọ yá'a ta'on ndu chíndaya'i ndu mií ndú noó choon kée dao ka na. Ña kóni ndu kían kua'ano cháá ka ndo xí'ín ña kándéé iní ndo Jesús, dá ná kandaya'i cháá ka choon kée ndu tein ndó, tító'on kị'o dándáki choon né'e ndu. ¹⁶ Ndi'i, dá ko'on ndu dána'a ndu to'on va'a sa'a Jesús noó na ndéi xíká cháá ka noo ndo'ó, ta o kú'u ta'on ndu dána'a ndu noó dána'a dao ka taa, dá kían ná dá'a ni chindaya'i ndu mií ndú noó choon ni kee dao ka ra. ¹⁷ Ta na ká'án kuryíí, kánian kuryíí ná sa'á ña ni kee sato'o yo Ndios sa'a ná. ¹⁸ Dá chí ñayuu, na chíndaya'i mií, kọ kándoo va'a na noo Ndios. Di'a ñayuu, na chíndaya'i mií Ndios, noón kúú na kándoo va'a.

11 ¹ Kóni ña ndeé ní koo ini ndo sa'í viti, chí ko'ín ka'ín xí'ín ndó tító'on kée iin ra ndúlóko. Tído ndeé koo ini ndo sa'í, ² dá chí kékuión yu'u sa'a ndo tító'on kuión ini Ndios sa'a ndo, dá chí sa ni kándooi ña nakị'o viii ndo'ó noo iin tó'ón Cristo kakuu yíi ndo tító'on kée iin tatá tá kua'an ra nakị'o ra de'e di'í tákí ra noo ndá'a taa kakuu yíi xí. Chí kóni ña koo vii ndo nakị'oi noo mií Cristo. ³ Tído nákaní inii

sa'a ndo, dá chí táto'on k'i'o ni kee koo, tá'an kirí mañá ni danda'í Eva, oon ni ví k'i'o dión nadaká taa to'ón ñaxintóni ndo, dá ya'a ndó koni xíxi ndó Cristo. ⁴ Dá chí tá vei dao ka taa, ta díin dána'a ra sa'a Jesús o duú ña ni daná'a mií ndu'u noo ndo, ta dána'a ra sa'a iin ka espíritu noo Espiritu ií Ndios, na ni natiin ndó, ta díin va dána'a ra sa'a to'ón va'a sa'a Jesús o duú ña ni daná'a ndu noo ndo, tído xí'o ndeé ini ndo sa'a rá. ⁵ Ta kí'in k'i'oi ña ko kúu ta'oin iin taa nóo noo taa chínaní ndó kúu apóstol ndáya'i. ⁶ Chí va'ará ko tí'a yu'u ka'an va'i, tído ko kámani ta'ón ña ndichí ni xí'o Ndios nooí. Dá chí noo ndidaá vá ña'a ni kee ndu, ta noo ndidaá ña'a ni ka'an ndu, ni na'a ndu tein mií ndó ña dión kíán.

⁷ ¿Á ni ya'i ni kee kuachi sa'a ña ni kenóoi mií, dá kandaya'i ndo'ó, xini ndo? Chí tá ni daná'i to'ón va'a Ndios noo ndo, ko ní kí'in ya'i ta'an vei. ⁸ Ta sa xio ndaaí di'ón ndá'a dao ka na kúu kuendá Jesús ni sa kuu ya'avii, dá ni sa ioi ni daná'i noo ndo. ⁹ Tá ni sa ioi xí'in ndó, ta nda'í kómani ña'a nooí, tído ni iin tó'ón ndó ko ní dándi'i inii. Chí ndidaá ña'a sa komani nooí ni xí'o dao ka ñani yo, na ni kii chí kuendá Macedonia. Ta noo ni iin ña'a ko ní dándi'i inii ndo'ó, ta ni iin kuu o dándi'i inii ndo'ó noo ña xínñó'í. ¹⁰ Ta sa'a ña nákaa to'ón ndaa Cristo ini nóí, sa'a ñoó ká'in xí'in ndó ña ko iin ta'on kuu ditá ña chindaya'ii choon kéei sa'a ña ko kí'in ya'i noo ndo'ó, na ndéi chí Acaya xaan. ¹¹ Ta, ¿ndiva'a ká'in dión, ká'an ndó? ¿Á ko kú'u ta'on inii sa'a ndo'ó, ndani? Mií Ndios kúu na ná'a ña kú'u nda'o inii sa'a ndo.

¹² Ta ña kéei kíán ko kí'in ya'avii noo ndo, ta dión ií vá kee, dá ná o ní'i dao ka taa, tá'an ra ndúkú chindaya'ii mií, ndi kee ra chidáo tá'an ra mií rá xí'in ndu'u. ¹³ Dá chí taa ñoó kúu apóstol to'ón, ta kúu rá taa kéchóon xí'in ña mañá, chí kée ra mií rá ña kúu rá apóstol Cristo.

¹⁴ Tído ná dá'a ni naá téi ini ndo ña k'i'o dión kée ra, dá chí dión ta'ani kée ña u'u, chí kéean mián ña kúuán táto'on iin ángel ndato tóon.

¹⁵ Sa'a ñoó o duú iin ña kuachi kíán kandaá ini yo ña taa kéchóon noo ña u'u kée ra mií rá ña kúu rá taa kéchóon noo ña ndaa. Tído kasandaá iin kuu, dá keyíko sa'a rá táto'on káa choon ni kee ra.

Yó'o ká'an Pablo sa'a ndidaá tandó'ó ni ndo'o na sa'a ña né'e na to'ón Jesús

¹⁶ Nándió koo tukui ká'in xí'in ndó ña ná dá'a ni ka'an ndó ña ndúlóko. Tído tá ká'an ndó ña dión kíán, dá natiin ndó yu'u táto'on iin na ndúlóko, dá nóno nooí chindaya'ii mií cháa. ¹⁷ Ta ña ká'in xí'in ndó viti, ko kíán ña ni natiin noo sato'o yo Ndios. Chí kíán táto'on ká'an iin na ndúlóko, sa'a ñoó kándéé inii chindaya'ii mií. ¹⁸ Ta sa'a ña kua'a nda'o taa chindaya'ii mií sa'a ña kée ra ñayuú yó'o, sa'a ñoó chindaya'i ta'ani yu'u mií. ¹⁹ Chí ndino'o ini ndo xí'o ndeé iní ndo seídó'o ndó taa ndeé to'ón, va'ará kaá ndo ña kúu ndó na ndichí. ²⁰ Ta xí'o ndeé ta'ani ini ndo va'ará náchi'i dao ra ndo'ó tixi ndá'a rá, o va'ará ketí'a dao ra

ndo'ó, o va'ará xío ndaa dao ra ña'a ndó, o va'ará chindaya'i dao ra mií rá noo ndo, o va'ará káni dao ra da'anda noo ndo. ²¹ Ta xíka'an ví nooí ka'in xí'in ndó ña ko ní kée ndu dión xí'in ndó, chí nóo va ió ini ndu.

Ta noo ña chindaya'i dao ka taa ñoo mií rá, chindaya'i ta'ani yu'u mií, va'ará ká'in tát'on ká'an iin ta ndúlóko. ²² ¿Á kúú rá ta hebreo? Ñaá ta'ani kúú yu'u. ¿Á kúú rá ta ñoo Israel, ña kúú ñoo Ndios? Ñaá ta'ani kúú yu'u. ¿Á kúú rá na ve'e tatá sá'ano Abraham? Ñaá ta'ani kúú yu'u. ²³ ¿Á kúú rá ta kéchóon noo Cristo? (Ká'in tát'on kée iin na ndúlóko.) Tído kéchóon cháa ka yu'u noo Cristo o duú mií rá, chí yu'u kúú ra kua'a cháa ka ni kéchóon noo Cristo. Ta sa'a mií ná kua'a nda'o ta'ándá ni kani ndava'a ñayuu yu'u, ta kua'a cháa ka ta'ándá ni sa kaa yu'u ve'e kaa, ta kua'a nda'o ta'ándá daá ió ña kuui. ²⁴ Ta o'on ta'ándá ni kani na Israel oko sa'on komi chirrión satá yu'u. ²⁵ Ta oni ta'ándá ni kani na yu'u xí'in vara, ta iin ka ta'ándá kua'an na ka'áni ná yu'u xí'in yuu, ta oni ta'ándá ni keta ka'ani barco ini taño'o noo nákaa kua'in, ta iin ñoo xí'in iin nduú ni sa nóo ni'inii noo taño'o. ²⁶ Ta ndó'o nda'o níoi íchi noo xionooi, chí ióan kuui kée yuta, ta ió ta'ani ña kuui kée ta kui'iná, ta ió ña kuui kée na ñooi, ta ió ta'ani ña kuui kée na ko kúú na Israel. Ta ió ña kuui noo kúú ñoo ná'ano, xí'in noo kúú yukú íchi xí'in noo taño'o, ta ió ta'ani ña kuui kée na chinaní mií ña kúú ná kuendá Jesús. ²⁷ Ta sa'a choon kéei, sa'a ñoo kútati nda'a vei, ta kua'a nda'o ta'ándá ko ní sá kidii, ta kua'a nda'o ta'ándá sa xí'i dokoi ña kuikoi xí'in ña íchii takuií, ta kua'a nda'o ta'ándá ni sa xionoo nditai, ta ni sa ndo'o níoi ña vixi chí koó dá'on kandixii. ²⁸ Ta noo ndidaá ka ña'a, ió iin ka ña'a ndó'i iin iin kuu kuu, chí nákani nda'o ini sa'a ndidaá na kúú kuendá Jesús ndéi iin rá iin ñoo. ²⁹ Chí, ¿ndi ndaa ndo'ó ndó'o níoi, ta ko ndó'o ta'ani níoi mií? Ko iin ta'on. O, tá kándéé dao taa danda'í ra ndo'ó, ¿a ko ná'a ta'on ndó ña xido nda'o ini?

³⁰ Tá miían kánian chindaya'ii mií, va'a kaan ná chindaya'ii mií noo ña ná'a ña kúú iin ta ko kómí ndée mií. ³¹ Ta mií Ndios, na kúú tatá sato'o yo Jesucristo, na daá kuití kánian natiin ñaño'ó, noón kúú na ná'a ña ko ká'an to'ín.

³² Tá ni sa io yu'u ñoo Damasco, ñoo nákaa iin ta né'e choon, ta nákaa ra tixi ndá'a rey Aretas. Kúú ni sa'anda ra choon noo ta ndaá yé'é ñoo ñoo ña ná kandeí nduu ra tiin ra yu'u, ni ka'án rá. ³³ Tído ndéi dao ñayuu ni taó ná yu'u ventana, dá ni danóo na yu'u ini iin tiyika ndika náoo ñoo ñoo, dá ni kuu ni kakii noo ndá'a taa ñoo.

Yó'o ká'an Pablo sa'a iin ña'a dándó'o níoi ná

12 ¹ Miían ndaa ndisa ni ña'a ko ndaya'i ña chindaya'ii mií, tído viti ná ko'in nakanii xí'in ndó sa'a ña ni na'a sato'o yo Jesús nooí, xí'in sa'a ña sa'a ni nakani na xí'in. ² Ta ná'a yu'u sa'a iin taa, ta taa yó'o iin xí'in Cristo, ta sa io uxí komi kua ni naki'in ñaá Ndios né'e

na ni sa'an na nda induú kúú oni. Xíni á ni sa'an ra xí'in nda yikí koño ra, o nío óon ra ni sa'an. Iin tó'ón dini Ndios kúú na ná'a. ³ Ta ná'a yu'u sa'a taa yó'o, ta xíni á ni sa'an ra xí'in yikí koño ra, o nío óon ra ni sa'an. Iin tó'ón dini mií vá Ndios kúú na ná'a. ⁴ Tído miían ndaa ni nadítá ñaa Ndios noo ndato téi kaa noo ió na. Ta ñoó ni seídó'o ra to'on, ña kían o kátí'a yó nakani yó, chi ni iin ñayuu ko ní ni'i tá'i nakani na sa'an. ⁵ Ta kuu va chindaya'i yu'u taa yó'o, tído o chindaya'i ta'on yu'u mií, chi chindaya'ii mií sava'a sa'a ña ná'a ña kúú iin ta ko kómí ndée mií. ⁶ Tído tá ká'an yu'u chindaya'avii mií, dá kían o kakuu ta'on yu'u iin taa oon ini, chi ña ndaa va ka'in. Tído o kée ta'oin dión, dá kían ni iin ñayuu ná dá'a ni chindaya'i cháa ka na yu'u noo ña ndé'é ná kéei o ña seídó'o na dána'i.

⁷ Ta sa'a ña ná o yá'a téi chindaya'ii mií sa'a ña ndato ni na'a Ndios nooi, sa'a ñoó ni kasaa iin ña'a dándó'an nioi, ta kían táto'on iin ión yáí tárnee ñíí, xini, ña kéchóon ña u'u dándó'an nímaí, dá kían ná o yá'i chindaya'avi mií. ⁸ Ta sa oni ta'ándá ni sei nda'avii noo sato'o yo Jesús ña ná díta ná ña kedaá xí'in ndó'o nímaí. ⁹ Tído di'a va ni kaa na xí'in: "Koó, sa vati va nákaaon tixi ña maní kée yu'u xí'ón, chi ndée mií yu'u kían ná'a va'a cháa ka noo na koó ndée." Sa'a ñoó ndani ndino'o ini yu'u chindaya'avii mií sa'a ña ná'a ña kúú iin taa ko kómí ndée mií, dión, dá ná'i ña nákaa tixi ndá'a ndée mií Cristo. ¹⁰ Ta sa'a ña ió ndée Cristo xí'in, sa'a ñoó kadii ini tá koó ndeéi, o tá kána'a ñayuu xí'in, o tá kamaní ña'a nooi, o tá kéndava'a ñayuu xí'in, o tá ndó'o nioi. Dá chi tá koó ndeéi, dá di'a kúú iin taa ndakí cháa ka kée Ndios.

¹¹ Tído, táto'on kée iin ta ndeé to'on, ki'o dión ni keei sa'a ña ni chindaya'avi mií, tído mií vá ndó ni kedaá xí'in, sa'a ñoó ni keei dión. Di'a mií vá ndó kánian nakoni ndo yu'u, dá chi noo ni iin tó'ón ta'on ña'a ko kándoo nóo yu'u noo taa chinaní ndó kúú apóstol ndaya'i, va'ará koó ña'a kúú. ¹² Kuá'a nda'o ña'a ná'ano kée na kúú apóstol Jesús ni kee yu'u tein mií ndó, ta ni keei ña xí'an kueé ió inii, chi ni keei ña ndato, xí'in ña kedaá xí'in ñayuu, dá naá iní na, xí'in ña ná'ano vei noo Ndios. ¹³ Sa'a ñoó, ¿ndí kían va'a ni kee yu'u xí'in dao ka na kúú kuendá Jesús, ta ko ní kéei ña xí'in ndo'o, xini ndo? Chi sava'a ña ni kee kían ko ní kí'in ya'i ta'an vei noo ndo. ¡Ká'ano koo ini ndo sa'i tá ká'an ndó ña ña yó'o kúú iin kuachi kini!

Yó'o ká'an Pablo ña sa'a na ñoo ñoó ta'ándá kúú oni

¹⁴ Kana'a ndó, chi sa ió nduui saai noo ndeé ndó ta'ándá kúú oni. Ta o dáta'an ta'on yu'u ndo'o xí'in ni iin ña'a, chi ko ndí'i ta'on ini yu'u sa'a ña ió noo ndo, di'a ndí'i inii sa'a mií vá ndó. Dá chi ko kánian koto takuáchí leé tatá xi, di'a na kúú tatá va kánian koto de'e na. ¹⁵ Ta ndino'o ini yu'u iói ña dándí'i ndidaá ña ió nooi sa'a ndo, ta ió ta'anii dándí'i ndidaá ndeéi sa'a ña kú'u inii sa'a ndo. Ta va'ará sá'ano cháa ka

ñā kú'u ini sa'a ndo, tído ndo'ó, dánkoo di'a ndó ñā kú'u ini ndo sa'í.

¹⁶ Tído kaá dao ndó ñā va'ará ko ní kí'in ya'i noo ndo, tído sa'á ñā kúúí iin ta mañá, sa'á ñoó ni danda'avíi ndo'ó, kaá ndo. ¹⁷ ¿Á ni danda'íi ndo'ó xí'ín iin ta ni tanda'í ni saa noo ndo, ká'an ndó? ¹⁸ Ni seí nda'avíi noo Tito saa xi xí'ín iin ka ñani yo noo ndéi ndó. Ta, ¿á ni danda'í Tito ndo'ó, tá dáá? ¿Á ko ná'á ndó ñā iin tó'on vá kúú ñaxintóni ndú, ta iin nóó vá íchi ñó'o ndu'u?

¹⁹ Ndá ndi kuu ká'an ndó ñā ká'an ndu dión, dá chi kóni ndu kandoo va'a ndu noo ndo. Tído koó, chi noo Ndios vá ká'an ndu dión sa'á ñā kúú ndú kuendá Cristo. Ta noo ndidaá ñā kée ndu, na maní mií, ndúkú ndu'u ñā kua'ano cháá ka ndo íchi Ndios. ²⁰ Chi yu'íi ñā tá ná saai noo ndéi ndó, oon ni ví natiin yu'u ndo'ó ndéi ndó kée ndó ñā ko náta'an ini, ta dión ni ndo'ó, o náta'an ini ndo kee yu'u. Dá chi oon ni ví ndéi ndó ndátó'on kuáchi ndo, o ndéi ndó xí'ín ñā u'u ini ndo, o ndéi ndó xí'ín ñā tondó ndo, o ndéi ndó sa'ándá tá'an ndó, o ndéi ndó dátaí chi'an tá'an ndó, o ndéi ndó káva'a ndó kuáchi sata dao ka ñayuu, o ndéi ndó xí'ín ñā táyíi ndó, o ndéi iin rá iin ndó kée ndó ñā kóni mií ndó. ²¹ Chi tá ná saai noo ndéi ndó, oon ni ví natiin yu'u ñā ka'an noo noo Ndios kee ndó. Ta oon ni ví kuakii xí'ín ndirá nooí sa'á ñā kuá'á nda'o ndó ni ya'a ni kee kuáchi, ta ko ná'a nandikó iní ndo sa'á ñā ni kee ndó kuáchi ka'an noo, o sa'á ñā ni kidi ndo xí'ín na ko kúú ñadi'í ndo o yíi ndo, o sa'á ndidaá ka kuáchi ni kee ndó xí'ín ñíi ndo.

13 ¹ Ta viti xíno oni ta'ándá saai noo ndéi ndó. Ta kana'á ndó ñā xínnó'ó yó uu ñayuu o oni ñayuu kandita k'i'o kuendá, dá keyíko yo iin tandó'ó. ² Sa ni ka'in xí'ín ndó tá ni sa ioi xí'ín ndó, ta viti ká'an tukui xí'ín ndó, ta kee ndó kuendá ñā ioi xí'ín ndó. Ta xian nani nákaa xíkái, tánda'í tuti yó'o kosaa noó na ni ya'a ni kee kuáchi, xí'ín noo ndidaá ka ndo'ó, chi tá ná saa tukui noo ndéi ndó, dá kían ni lú'u ñā maní o koo sa'a ndo. ³ Chi ndúkú ndó korndodó ndó yu'u nde'á á miían ndaa kuiti Cristo kúú na ká'an noó yu'u. Ta kana'á ndó ñā ko kúú ta'on na iin na koó ndée xí'ín ndó. Di'a ná'a na ñā kómí ná ndidaá ndée xí'ín mií ndó. ⁴ Dá chi va'ará ni xi'i Jesús ndika cruz tát'on iin ta koó ndée, tído viti takí na kée ndée mií Ndios. Ta dión ta'ani ndó'o ndu'u, ko ta'ón ndée kómí ndú ñayuu yó'o tát'on ni ndo'o mií Cristo. Tído kataki ndu kandeí ndu xí'ín ná kee ndée mií Ndios, dá kechón ndu noo ndo.

⁵ Kande'é va'a ndó mií ndó, ná kande'á á miían ndaa kándée iní ndo Jesús o koó, ta korndodó ndo mií ndó. Ta, ¿á ko xí'o ta'on ndó kuendá ñā io Jesucristo xí'ín ndó? Chi tá ko io na xí'ín ndó, dá kían sa ni kandoo va ndó ni tuú ndó noó ñā kándisa ndó. ⁶ Ta kándée ini ñā xí'o ndó kuendá ñā ko ní kándoo ta'on ndu ni tuú ndú noó ñā kándisa ndu. ⁷ Xíka ndu ñā maní noo Ndios sa'a ndo, dá ni iin tó'on ndó ná o yá'a kee ñā kini. Ta ko kée ndu dión, dá kandoo va'a ndu noó ñayuu. Dión kée

ndu sa'a ndo'ó, dá kati'a ndó kee ndó ña va'a, va'ará ká'an dao ka ñayuu ña ni tuú ndú noó ña kándisa ndu. ⁸ Chi o kúu ta'on chituu ndu ña ndaa, di'a ndíta ndu chindeé ndúan. ⁹ Sa'á ñoó náta'an ini ndu kakuu ndu taa koó ndée tá ná kuita toon ndó xí'in ña kándisa ndó. Ta xíka ndu noo Ndios ña ná xinkuei ndó koo ndó tát'on k'i'o kóni mií ná. ¹⁰ Ta táai to'on yó'o kosaa noo ndo nani nákaa xíkái, dá kían, tá ná saaj noo ndéi ndó, ná dá'a ni ka'an deein xí'in ndó, chi ni x'i'o sato'o yo Jesús choon yó'o nooi, dá dákuá'anoi ndo'ó xí'in to'on Ndios, ta ko ní x'i'o naan nooi ña dánaá di'ai ndo'ó.

Xí'in ndisá'an yó'o dándí'i Pablo ña ká'an na

¹¹ Ta viti ko'in dándí'i ña ká'in xí'in ndó. Ná kadii iní ndo, ta ndeyíko ndo mií ndó noo Ndios, ta k'i'o tá'an ndó tandeé iní, iin tó'on ná kakuu ñaxintóni ndo, ta kandeí va'a ndó xí'in iin rá iin ndó. Ta Ndios, na x'i'o ña kandeí ñochí yó, na x'i'o ña ku'u ini sa'a sátá'an yó, ná koo xí'in ndó. ¹² Ta chitó tá'an ndó noo ndo, ta ña yó'o ná kakuu iin ñañó'ó ka'an tá'an ndó ndisá'an sa'á ña kúu ndó kuendá Jesús. ¹³ Ta ndidaá ñayuu Ndios ndéi xí'in yu'u yó'o ká'an na ndisá'an xí'in ndó.

¹⁴ Ta ná koo ña mani x'i'o sato'o yo Jesucristo xí'in iin rá iin ndó, ta ná ku'u ini sa'a sátá'an ndó tát'on k'i'o kú'u ini Ndios sa'a ndo, ta iin ná kakuu ndó kee Espíritu iñ ná. Dión ná koo.